


TEZAU LITURGIC
20 DECEMBRIE

SLUJBA
SF.PREOT
IOAN SERGHIEV
DE LA
KRONSTADT-
ST.PETERSBURG



SERBLIAK, BELGRAD, 1941



Мѣсяца Декемврїя въ 20-й день Служба святаго и преподобнаго отца нашего Іоанна Кронштадтскаго

ВЕЧЕРЪ

**Блаженъ мужъ. На Господи воззвахъ:
стихиры, гласъ 1-й.**

Отче Іоанне преблаженне, всѣхъ святыхъ подражатель былъ еси: святую вѣру патріарховъ стяжавъ, пророковъ и апостоловъ ревность, святителей же преподобіе и богомысліе, исповѣдниковъ дерзновение, безсребренниковъ безмездную помощь, преподобныхъ подвижниковъ непрестанную молитву, сего ради святую твою память свѣтлую празднуемъ.

Преподобный отче Іоанне, гласъ Евангелїа Господня послушавъ и богатство и славу, яко прахъ, вмѣнивъ, ближнихъ твоихъ, яко отецъ истинный возлюбилъ еси, нищїя и убогїя питавый, всѣмъ же непрестанно вопїя: возлюбите Господа и обрящете жизнь вѣчную, ничто же предпочтите паче любви Его, да егда прїидеть во славу, обрящете радость со святыми, съ ними же и насъ поминай, молитвенниче нашъ неусыпный.

Отче нашъ Іоанне богомудре, страхомъ утвердився Божіимъ, начало премудрости разумѣлъ еси, паки же страхъ любовію изгналъ еси, яко страхъ муку имать, якоже апостолъ любви научилъ есть насъ, любовію же Христу сраспявся, свойственнѣйшій Ему бывъ; тѣмже отче нашъ, вѣрныхъ украшалъ еси разумы и Бога любити стадо твое научилъ еси. Христа Бога моли даровати и намъ благодать сію и велию милость.

Господь сила сердца моего, Господь мой свѣтъ ума моего, Господь покой мой и радость моя, моя вѣра, надежда и любовь, Сей есть пища моя и питіе мое, одежда моя и покровъ. Вразуми убо и насъ, отче святыи, сія словеса твоя разумѣти и во Господѣ полагати спасеніе наше, подаждь и намъ духа твоего, якоже Ілія Елисею, да будетъ во Господѣ надежда наша, все упованіе наше.

Слава, гласъ 8.

Жива будетъ душа моя, Господи, и восхвалитъ Тя, сице глагола Давидъ пророкъ. Такожде и ты, святе, от стражи утреннія до нощи пѣлъ еси. Научи убо и насъ, заблудшее твое стадо, познати тя, пастыря добраго, и вслѣдъ гласа твоего ходити и непрестанно купно съ тобою взывать: пою Богу моему, дондеже есмь.

**И нынѣ: предпразднству [1] или
богородиченъ.**

Чтеніе 3 изъ Притчей, изъ общей Минеи.

**Стихиры на литіи — храму:
на Слава, гласъ 1-й.**

Молящеся Духомъ Святымъ молимся, сего ради вся молитвы церковныя дыханіе Духа Святаго суть и вси христіане рожденіе Его есми. Прииди убо и вселися въ ны, Душе Святый, помилуй и созижди вся ны, да будемъ едино Тѣло Христово. Такова бысть непрестанная молитва твоя, предивный Іоанне отче нашъ, и послуша тя Богъ и помаза тя елеемъ радости вѣчныя.

**И нынѣ: предпразднству или Богородиченъ.
На стиховнѣ, стихиры гласъ 4-й.**

Отъ пеленъ Господу присвоился еси, издѣтска смыслъ мужа совершенна стяжавъ и премудросте Божией возжелѣвъ весь Божія обитель былъ еси, отче нашъ Іоанне благодатне.

Стихъ: Честна предъ Господомъ смерть преподобныхъ Его.

Умомъ благодатию освященнымъ Святѣй Троицѣ предстоя, блаженне Іоанне, отче нашъ, небесными зарями сущія во тмѣ грѣховней просвѣщаль еси, освѣти и насъ свѣтомъ твоего боговѣдѣнія.

Стихъ: Блаженъ мужъ, бояйся Господа, въ заповѣдѣхъ Его восхощетъ зѣло.

Непостижимый свѣтъ ночи въ тебѣ, преподобне отче, и свѣщу пресвѣтлу постави тя Господь среди тьмы грѣховныя. Тѣмже и мы тобою научени благодатную память твою поемъ, Іоанне.

Слава, гласъ 6-й.

Союзомъ любви апостолы Твоя связавый, Господи, и отца нашего Іоанна, яко новаго благовѣстника любви Твоея поставивый, утверди и нынѣ, Спасителю нашъ, союзъ любви церковныя, да совокуплени поемъ Тя и неизреченную Твою благодать.

**И нынѣ, предпразднству или Богородиченъ.
Тропарь:**

Боже, отецъ нашихъ, **или Въ** тебѣ, отче, извѣстно, спасесея, еже по образу, **и пр.**

Или гласъ 8-й.

Любовію Христовою уязвися, преподобне Іоанне, многи чада церковныя, яко отецъ ко Христу привелъ еси, сего ради память твою совершающе Спасово утѣшеніе приедемъ и благодать Его исповѣдуемъ.

НА УТРЕНИ

По 1-мъ стихословіи съдаленъ, гласъ 4-й.

Не презрѣлъ еси, отче Іоанне, ни странна, ни пришельца, но всѣмъ былъ еси благъ и милости глубина, сиротъ отецъ и вдовамъ защита, нагихъ одѣяніе и алчущихъ пища. Помяни и насъ, убогихъ чадъ твоихъ, и не отрини отъ благодатныя любви твоея.

Слава и нынѣ, предпразднству или Богородиченъ.

По 2-мъ стихословіи съдаленъ, гласъ 5-й.

Божественною силою укрѣпляемъ, побѣдилъ еси невидимыхъ враговъ искушенія и къ свѣту невечернему приблизился еси. Уврачуй и душъ нашихъ страсти и совѣтомъ твоимъ облистай ны, яко врачъ и утѣшитель всѣмъ отъ Бога данъ еси, Іоанне отче нашъ.

Слава и нынѣ, предпразднству или Богородиченъ.

Съдаленъ по полиелеи, гласъ 8-й:

Слова Божія пламенный служителю, Іоанне богодухновенне, ты вмѣстилище вѣры Христовой былъ еси, сего ради Господь, якоже новаго Авраама отца многихъ постави тя. Моли убо, отче святыи, всѣмъ намъ, чадомъ Божиимъ быти и душамъ нашимъ спастися.

Слава и нынѣ, предпразднству или Богородиченъ.

По 50-мъ псалмѣ самогласенъ, гласъ 6-й.

Преподобне отче Іоанне, во всю землю изыде
вѣщаніе исправленій твоихъ, тѣмъ на небесѣхъ
обрѣлъ еси мзду трудовъ твоихъ, демонскіе
погубилъ еси полки и ангельскія достиглъ еси
чины, ихже житію безъ порока и поревновалъ
еси, дерзновение имѣя ко Христу Богу, миръ
испроси душамъ нашимъ.

**Канонъ Святаго — по Уставу, его же
краестрочіе: Моя жизнь во Христѣ, Ему же пою
во вся вѣки. Гласъ 4-й.**

Пѣснь 1-я.

Ирмосъ: *Моря Чермнаго пучину
немокренными стопами древле шествовалъ
Израиль крестообразно Моисеовыма руками
Амаликову силу въ пустыни побѣдилъ есть.*

Моя чувствованія въ Тебѣ утверди, Спасителю
мой, да возмогу достойне воспѣти молитвы и
подвиги Тя возлюбльшаго и Тобою
возлюбленнаго служителя Твоего, отца нашего
Іоанна.

Отъ юности первозванному апостолу послѣдую
и Его свѣтосіаннымъ Крестомъ озарився,
невѣдѣнія мглы избѣгъ еси, Христу хвалебную
пѣснь воспѣва блаженне.

Якоже Илія колесницею огненною, тако и ты колесницею добродѣтелей на небо возшелъ еси. Отнюду же ниспослати и намъ житія исправленіе Господа умоли.

Богородиченъ: Жезлъ прорасте, Дѣво, корене Іессеова, цвѣтоносый всеблаженный плодъ спасенія вѣрою воспѣвающимъ Тя.

Пѣснь 3-я.

Ирмосъ: *Веселится о Тебе Церковь Твоя, Христе, зовущи, Ты ми крѣпость, Господи, и прибѣжище и утвержденіе.*

И нравомъ причастникъ и житіемъ подражатель апостоламъ бывъ, богодуховенне, слово истины до конца исправилъ еси.

Зрительно царства небеснаго душевное око твое, яко чисто, имѣя жизнь твою святѣ управилъ еси, отче предивный, сего ради о Бозѣ ты прославляемъ.

Не трудящійся да не ястъ, сію апостольскую истину всей братіи твоей вѣщаль еси и домъ трудолюбія нищимъ и болящимъ воздвиглъ еси, да ся питають трудами рукъ своихъ аще и немощны суть.

Богородиченъ: **В**ся свѣтъ еси, Владычице, вся святыня, вся благодѣ, вся премудрость, вся можеши, яко Мати всемогущаго, Едина и Та же

Всесовершенная, яко Мати всесовершеннаго Царя славы.

Пѣснь 4-я.

Ирмосъ: *Воздвижена Тя видѣши Церковь на Кресте солнца праведнаго ста въ чину своемъ, достойно взывающи, слава силъ Твоей, Господи.*

Основаніе твердо — Христа имѣя, второй Авраамъ былъ еси, приѣмля отъ всѣхъ странъ приходящія къ тебѣ и тѣхъ ко Господу приводилъ еси и тѣми угодная Богу творилъ еси.

Храмъ Богу сердце твое хотѣй устроить, въ дому Божіемъ непрестанно служить возжелѣлъ еси и тамо небесныя доброты зрѣлъ еси.

Росою подвиговъ твоихъ вся страсти тѣлесныя угасивъ, возжегъ еси просвѣщеніе безстрастія и сынъ вѣчнаго дне былъ еси, отче блаженне.

Богородиченъ: **И** нам подаждь, Владычице, чистоту сердечную, сыновнюю довѣрчивость и любовь, яже къ Тебѣ, — всегда и нынѣ и присно и во вѣки.

Пѣснь 5-я.

Ирмосъ: *Ты, Господи, ми свѣтъ, въ міръ пришелъ еси, Свѣтъ святыи, обращаи изъ мрачна невѣденія воспѣвающія Тя.*

Сподобился еси вышнихъ дарованій, отче, Господу твоему непрестанно служа и апостольскіе труды присно подражая.

Тлѣнныя твоея плоти сладострастіе умертвивъ, душу нетлѣнную благочестіемъ оживалъ еси и сію домъ Духа Божественна сотворилъ еси.

Евангеліе Христово всѣмъ усердно проповѣдуя, трапезы Господней причастникъ повседневный былъ еси, самъ себе и паству твою, яко жертву живу, и святу Богови устрояя.

Богородиченъ: Едина отъ Троицы родила еси Пречистая, милосердія ради на земли являшагося во двою естеству, Егоже непрестанно моли спасти души наша.

Пѣснь 6-я.

Ирмосъ: *Пожру ти со гласомъ хваленія, Господи, Церковь вопіетъ Ти, отъ бѣсовскія крове очистившись милостію отъ реберъ истекшею Ти кровію.*

Маслина плодовита въ дому Господа твоего былъ еси, Іоанне богоявленне, яко вѣдѣніе божественное Господь дарова ти и въ дѣланіи апостольствѣмъ укрѣпи тя.

Уди тѣла Христова есте вы, тако со апостоломъ проповѣдалъ еси и Христа единого любить училъ еси, да вси едино будутъ.

Житіє твоє свято, слово твоє, богомудре, благодати Божіей исполнено, сердце твоє молитвы благодатныя сосудъ бысть, сего ради вѣрою и любовію ты почитаемъ.

Богородиченъ: Единая благая Владычице, яви владычество твоє на насъ, избавляючи насъ отъ всякія скверны лукавыхъ помышленій, отъ всякихъ бѣдъ и золь и козней демонскихъ, яко благая Мати Божія.

Кондакъ, гласъ 3-й.

Божественныя вѣры проповѣданіемъ и любви Евангельскія исполненіемъ Церковь Христова ты отца нарече, преподобне Іоанне, яко истинный отецъ чадомъ, всѣмъ и нынѣ зовещи со апостоломъ: прїидите, обрѣтохомъ Желаемаго.

Пѣснь 7-я.

Ирмосъ: *Въ пеци персидстѣй авраамстїи отроци любовію благовѣрія паче, нежели пламеніемъ опаляемы взываху: благословенъ еси въ Церкви славы Твоея, Господи.*

Промысломъ Божіимъ свѣтъ благочестія среди тмы тяжкія безбожія и невѣрія ты явился еси отче, вся призывая звати: благословенъ еси въ Церкви славы Твоея, Господи.

Образъ Божій чловѣкъ есть, ты же, отче Іоанне, и зеркало любви Божіей пресвѣтло былъ

еси и домъ Святыя Троицы, юже и мы грѣшніи прославляемъ.

Юже отъ Господа благодать пріялъ еси недуги и страсти исцѣляти челоуѣомъ, да вси съ тобою единомудренне поють: благословенъ еси, Господи Боже, во вѣки.

Богородиченъ: Владычице, спаси родъ Твой, спаси единокровныя Твоя, Спаси ны, Мати Живота и всего рода челоуѣча, аще и недостойни есмы Тя Матерь себѣ нареци, освяти, утверди и спаси насъ молитвами Твоими.

Пѣснь 8-я.

Ирмосъ: Руцѣ распротеръ Данилъ львова зїянїя въ ровъ затче огненную силу угасиша, добродѣтелію поясавшеся иже благочестїя рачители отроци зовуще: благословите вся дѣла Господня Господа.

Очисти сердца и мысли наша молитвами твоими и, яко землю плодоносну покажи я, да добродѣтелію препоясавшеся, зовемъ: благословите вся дѣла Господня Господа.

Вѣнцемъ благодатныхъ даровъ вѣнчался еси, премудрость высшую почитая и присно зовый: благословите вся дѣла Господня Господа.

Троиченьъ: Слава Тебѣ, всесвятый Животворящій Душе, отъ Отца исходяй и въ Сыне присно почиваяй, слава Тебѣ, Сыне Божій, Святымъ Духомъ освъщай, укрѣпляй и умудряй насъ, слава Тебѣ, Отче, благоволяй о насъ присно Духомъ Святымъ, нераздѣльная Троице Единице, помилуй насъ.

Богородиченьъ: Яже міру рождаши спасеніе, еяже ради отъ земли на высоту взяти быхомъ, радуйся благословенная, покрове и державо, стѣно и утвержденіе, поющимъ чистая: Господа воспѣвайте дѣла и превозносите Его во вѣки.

Пѣснь 9-я.

Ирмосъ: Камень нерукосѣчныя горы отъ нескѣкомыя Тя, Дѣво, краеугольный отсѣчеся Христосъ, Иже совокупивъ расстаяшая естества, тѣмъ веселящіеся Тя, Богородице, величаемъ.

Воистину свѣтъ міру явился еси, добродѣтелию украшенъ и пастырь изряденъ православныя Церкви былъ еси, Христа прославляя, тѣмъ веселящеся ты, отче святыи, ублажаемъ.

Едино тѣло, Единъ Господь, едина вѣра, едино крещеніе, тѣмже истинствующе въ любви да возрастимъ въ Него всяческая, Иже есть глава Христосъ, яко же со апостоломъ преподобный отецъ нашъ заповѣда.

Князи людстїи и царїе воспѣша тя и восхвалиша тя, ты же славу земную всю презрѣлъ еси и токмо съ съ народомъ Божїимъ возжелалъ еси купно быти и прославляти Господа во вѣки.

Богородиченъ: **И**же во утробу всельшася Дѣвыя и отъ Сея страшно и выше слова наздавши древняго Адама, Господи поемъ и славословимъ во вѣки.

Свѣтиленъ, гласъ 4-й.

Первозванному ученику Христову подражавъ, пастырь добрый воистину былъ еси и плодъ многъ вѣрныхъ Господу Твоему привелъ еси и до послѣдняго твоего издыханїя взывалъ еси: моя жизнь во Христе есть.

Слава и нынѣ, предпразднству или Богородиченъ.

На хвалитѣхъ, стихиры, гласъ 6-й.

О, крѣпосте моя, Іисусе, Сыне Божїй! О, свѣте ума моего и мире, и радости сердца моего, слава Тебѣ, слава Тебѣ избавителю отъ невидимыхъ врагъ моихъ; тако, отче нашъ, вопїялъ еси ко Господу Твоему, тако и насъ вразуми воспѣти всѣмъ сердцемъ, Господи, Спасителю нашъ, слава Тебѣ.

Образъ Божій есте вы, сего ради храните великій образъ сей, образъ красоты Божіей, образъ безмѣрныя любви Его, да будете чада Отца нашего, Иже на небесѣхъ, да будете святы, якоже и Отецъ вашъ святъ есть. Тако пастырю богомудрый, паству твою училъ еси, тако и самъ святъ пожилъ еси.

Христосъ вочеловѣчися, призвавъ къ покаянію разбойники и блудницы, и ты, пастырю многомилостивый, заповѣдь Пастыреначальника исполняя, съ мытари ядѣше и со грѣшники бесѣдоваше, вся къ покаянію призывая и вся научая молиться: Боже, милостивъ буди мнѣ, грѣшному, Боже милостиве, слава Тебѣ.

Якоже пророци святіи о пастырѣхъ израилевыхъ, тако и ты, отче нашъ, о пастырѣхъ слезы проливалъ еси, сие глаголя: пастыри и паства согрѣшиша предъ Тобою, Господи, всѣ уклонишася вкупѣ непотребни быша, и что сотвориши намъ, Господи? кровь завета Твоего вопіетъ отъ земли, обаче гласъ Твой не услышанъ есть, и что сотвориши намъ Господи? Прежде даже до конца не погибнемъ, спаси ны.

Слава, гласъ 7-й.

Поклоняяся иконамъ святымъ, воспѣваю Бога воплощеннаго, образъ славы Отчія, воспѣваю и Отца безначально Сына родившаго, прославляю

богоподобіе челоуѣковъ, иже храмы Духа Святаго суть, такожде и въ чувствѣ имѣю силу Креста Животворящаго. Таково бысть славное богословіе твое, отче святыи, имже великимъ учителемъ древнимъ уподобился еси, образъ Бога воплотившагося восхваляя.

**И нынѣ, предпразднству или Богородиченѣ.
Славословіе великое. Отпустѣ.**

Примѣчаніе:

[1] Аще служба творится 20-го числа декабря.

Источникъ: *Іеросхимонахъ Пахомій келейной обители Вознесенія Господня на Афонѣ. Опытъ акафиста и служба честному и славному іерею Божію о. Іоанну Кронштадтскому.* — Перепечатка изъ книги И. К. Сурскаго «О. Іоанн Кронштадтскій», т. II. — Бѣлградъ, 1941. — С.18-27.

